

# PRAVILNIK

## O UTVRĐIVANJU ZAJEDNIČKIH KRITERIJA ZA LICENCIRANJE ČLANOVA LJEKARSKE/LIJEČNIČKE KOMORE FBiH I ČLANOVA KANTONALNIH/ŽUPANIJSKIH LJEKARSKIH/LIJEČNIČKIH KOMORA

("Sl. novine FBiH", br. 15/2026)

### I. OPĆE ODREDBE

#### Član 1

Ovim Pravilnikom utvrđuju se uslovi i nadležnosti te uređuju postupci licenciranja ljekara/liječnika, državljana Bosne i Hercegovine i stranih državljana, koji rade na području Federacije Bosne i Hercegovine, a koje provode kantonalne/županijske ljekarske/liječničke komore, odnosno Ljekarska/Liječnička komora FBiH.

#### Član 2

Postupci licenciranja ljekara/liječnika, u smislu ovog Pravilnika, podrazumijevaju:

- 1) postupak izdavanja licence ljekaru/liječniku,
- 2) postupak obnavljanja licence ljekaru/liječniku,
- 3) postupak oduzimanja licence ljekaru/liječniku,
- 4) postupak ukidanja licence ljekaru/liječniku i
- 5) postupak poništavanja licence ljekaru/liječniku.

### II. USLOVI ZA LICENCIRANJE

#### Član 3

Uslovi za licenciranje ljekara/liječnika članova kantonalnih/ županijskih komora, odnosno Ljekarske/Liječničke komore FBiH su:

- 1) stručna kvalifikacija koja obuhvata formalno obrazovanje,
- 2) položen stručni ispit u stručnom zvanju,
- 3) članstvo u Ljekarskoj/Liječničkoj komori FBiH, odnosno kantonalnoj/županijskoj ljekarskoj/liječničkoj komori,
- 4) državljanstvo Bosne i Hercegovine,
- 5) poznavanje jednog od jezika koji su u službenoj upotrebi u Bosni i Hercegovini, na razini koja je potrebna za nesmetanu i nužnu komunikaciju s pacijentom.

Izuzetno, uslov iz alineje 4. stava 1. ovog člana nisu dužni ispuniti ljekari/liječnici strani državljeni.

Ljekari/liječnici državljeni BiH dužni su ispuniti sve uslove iz stava 1. ovog člana osim uslova iz alineje 5.

### ZNAČENJE POJMOVA

#### Član 3a

Pojmovi koji se koriste u ovom Pravilniku imaju sljedeće značenje:

**"licenca"** - javna isprava kojom ljekar/liječnik stiče pravo da na području Federacije Bosne i Hercegovine samostalno obavlja poslove u struci i u okviru stručnog naziva određenog licencom (doktor medicine, specijalista, odnosno subspecijalista, akademska titula, odnosno naučno-nastavno zvanje ili počasni naziv primarijus).

**"visokoškolske ustanove"** - univerziteti i visoke škole.

**"univerzitet"** - je ograničen na visokoškolske ustanove koje se bave i nastavnim i istraživačkim radom, koje nude akademske stepene sva tri ciklusa, s ciljevima koji uključuju unapređenje znanja, misli i školstva u Bosni i Hercegovini, obrazovni, kulturni, društveni i ekonomski razvoj Bosne i Hercegovine, promociju demokratskog građanskog društva i postizanje najviših standarda nastave i istraživačkog rada; - odnosi se na visokoškolsku ustanovu koja realizuje najmanje pet različitih studijskih programa iz najmanje tri naučne oblasti - prirodne nauke, tehničke nauke, biomedicina i zdravstvo, biotehničke nauke, društvene nauke i humanističke nauke;

**"akreditacija"** - nezavisna vanjska ocjena sistema kvaliteta visokoškolske ustanove koja rezultira formalnom potvrdom o usklađenosti i/ili ispunjenosti kriterija za akreditaciju koji su u saglasnosti sa "Standardima i smjernicama za osiguranje kvaliteta u Evropskom prostoru visokog obrazovanja" (ESG) i relevantnim zakonima i propisima; - provodi se kao postupak a) akreditacija visokoškolske ustanove (institucionalna akreditacija) i b) akreditacija studijskih programa koji se izvode na visokoškolskim ustanovama (akreditacija studijskih programa);

**"studijski program"** - predstavlja nastavni plan i program koji pokriva jednu ili više znanstvenih oblasti, a čija realizacija kroz znanstveno-nastavni/umjetničko-nastavni proces vodi do jednog od tri akademska stupnja sukladno Bolonjskoj deklaraciji o evropskom prostoru visoke naobrazbe te ostalim dokumentima koji uređuju taj proces; znači zaokruženu cjelinu učenja koja vodi ka konkretnoj kvalifikaciji. Studijski program je fleksibilan skup obaveznih i izbornih predmeta/modula čijim savladavanjem se obezbjeđuje dostizanje planiranih ishoda učenja. Studijski program može da uključuje uz predmete/module praktičan rad, studentske prakse i izradu završnog rada;

**"licenciranje visokoškolske ustanove"** - proces provjere ispunjenosti minimalnih standarda za početak rada i obavljanje djelatnosti visokog obrazovanja. Licenca predstavlja dozvolu za rad koju visokoškolskim ustanovama izdaju nadležne obrazovne vlasti nakon što nezavisne komisije stručnjaka za licenciranje, koje imenuju nadležne obrazovne vlasti, provjere ispunjenosti minimalnih standarda. Minimalne standarde i proces provjere ispunjenosti propisuju nadležne obrazovne vlasti u svojim aktima o licenciranju. Minimalni standardi su najčešće kvantitativno normirani i odnose se na prostorne, materijalno-tehničke i ljudske resurse visokoškolske ustanove. Visokoškolska ustanova smatra se osnovanom upisom u sudski registar, čime stiče status pravnog lica, a pojedine studijske programe može početi izvoditi tek nakon provedenog postupka i odobravanja (licenciranja) svakog pojedinog studijskog programa koji namjerava izvoditi;

**"licenciranje studijskog programa"** - proces provjere akademskog sadržaja, relevantnosti ishoda učenja za tržište rada, te kapacitet visokoškolske ustanove da provede predloženi studijski program, u skladu sa zakonom i Standardima i normativima visokog obrazovanja kantona. Predloženi studijski program i akademski sadržaji moraju biti u skladu sa strategijom, vizijom i misijom visokoškolske ustanove, a struktura studijskog programa u skladu sa zakonom i principima Bolonjske deklaracije. Visokoškolska ustanova može izvoditi određeni studijski program nakon što isti licencira.

### III. NADLEŽNOST

#### Član 4

Postupak upisa u registar ljekara/liječnika, kao i izdavanja, obnavljanja, oduzimanja, ukidanja i poništavanja licence za ljekare/liječnike, koji rade na području Federacije Bosne i Hercegovine, provode kantonalne/županijske ljekarske/liječničke komore (u daljem tekstu: nadležne ljekarske/liječničke komore) registrovane za izdavanje, obnavljanje, oduzimanje, ukidanje i poništavanje licence.

#### Član 5

Postupak upisa u registar ljekara/liječnika, kao i izdavanja, obnavljanja, oduzimanja, ukidanja i poništavanja licence, za ljekare/liječnike koji rade na području Federacije Bosne i Hercegovine, provode nadležne kantonalne/županijske ljekarske/liječničke komore, dok za ljekare/liječnike koji rade na području Brčko Distrikta BiH, postupak provodi Ljekarska komora Tuzlanskog kantona.

Izuzetno, ukoliko ljekar/liječnik djelatnost u okviru svoje struke obavlja na području jednog kantona, a dopunski rad obavlja na području drugog kantona, postupak izdavanja, obnavljanja, oduzimanja, ukidanja i poništavanja privremene licence za rad na području drugog kantona, provodi Ljekarska/Liječnička komora FBiH.

Ukoliko ljekar/liječnik djelatnost u okviru svoje struke obavlja na području entiteta Republika Srpska ili Brčko Distrikta BiH, a dopunski rad obavlja na području jednog od kantona u Federaciji Bosne i Hercegovine, postupak izdavanja, obnavljanja, oduzimanja, ukidanja i poništavanja privremene licence za dopunski rad na području tog kantona u Federaciji Bosne i Hercegovine, provodi nadležna kantonalna/županijska ljekarska/liječnička komora kantona na čijem području se obavlja dopunski rad.

Ljekar/liječnik koji obavlja svoju djelatnost na području entiteta Republika Srpska može obavljati dopunski rad na području entiteta Federacija Bosne i Hercegovine samo kod jednog poslodavca.

Ljekarska/Liječnička komora F BiH nadležna je i onda kada ljekar/liječnik dio radnog vremena obavlja u jednom kantonu, dok drugi dio radnog vremena ljekar/liječnik obavlja u drugom kantonu/kantonima.

U slučaju iz prethodnog stava, kantonalna komora gdje liječnik obavlja veći dio radnog vremena ili po izboru liječnika je primarna, dok je Ljekarska/Liječnička komora F BiH nadležna za izdavanje licence u drugom kantonu.

Ljekarska/Liječnička komora F BiH je nadležna i onda kada dopunski rad obavlja ljekar/liječnik iz stava 1. ovog člana.

Postupak izdavanja privremene licence ljekarima/liječnicima stranim državljanima koji privremeno borave na teritoriji Federacije Bosne i Hercegovine, po pozivu zdravstvenih ustanova sukladno odredbi člana 20a. ovog Pravilnika, provodi Ljekarska/ Liječnička komora FBiH koja izdaje privremenu licencu uz popratno rješenje, te vodi posebnu evidenciju dolazaka ljekara/liječnika stranih državljana po navedenom osnovu.

## Član 6

Postupak upisa u registar ljekara/liječnika, kao i izdavanja licence, za ljekare/liječnike koji nisu zaposleni, mjesno nadležna je kantonalna/županijska ljekarska/liječnička komora kojoj se ljekar obrati zahtjevom za upis u registar ljekara/liječnika i izdavanje licence, odnosno svaka kantonalna/županijska ljekarska/liječnička komora registrovana za izdavanje, obnavljanje, oduzimanje, ukidanje i poništavanje licence.

## Član 7

Postupak upisa u registar ljekara/liječnika, kao i izdavanja licence, za ljekare/liječnike koji su zaposleni, mjesno nadležna je kantonalna/županijska ljekarska/liječnička komora na području koje ljekar/liječnik obavlja svoju djelatnost i koja je registrovana za izdavanje, obnavljanje, oduzimanje, ukidanje i poništavanje licence.

## IV. LICENCA

### Član 8

Licenca je javna isprava kojom ljekar/liječnik stiče pravo da na području Federacije Bosne i Hercegovine samostalno obavlja poslove u struci i u okviru stručnog naziva određenog licencom (doktor medicine, specijalista, odnosno subspecijalista, akademska titula, odnosno naučno-nastavno zvanje ili počasni naziv primarijus), ukoliko ovim Pravilnikom nije drugačije propisano.

### Član 9

Licenca se izdaje kao redovna i privremena.

Redovna licenca se izdaje na period od šest (6) godina.

Privremena licenca se izdaje na period kraći od šest (6) godina i u slučajevima propisanim ovim Pravilnikom.

Privremena licenca na period do jedne godine izdaje se ljekarima/liječnicima starosne dobi 65 godina života i više, bez obzira na radnopravni status te penzionisanim ljekarima/liječnicima, na način propisan ovim Pravilnikom.

Ljekarima/liječnicima koji bi u periodu važenja redovne licence napunili 65 godina života izdaće se privremena licenca na period do 65. godine života.

### Član 10

Licenca izdata od strane nadležnih ljekarskih/liječničkih komora (član 4, 6 i 7. Pravilnika) ima važnost na teritoriji kantona komore koja je licencu izdala.

Privremena licenca izdata od strane Ljekarske/Liječničke komore F BiH u skladu sa članom 5. Pravilnika, ima važnost na teritoriji F BiH.

Privremena licenca koju izdaje Ljekarska/Liječnička komora FBiH bit će izdana na zahtjev člana kantonalne/županijske ljekarske/liječničke komore, onim ljekarima/liječnicima koji ispunjavaju uslove bez plaćanja naknade.

Privremena licenca koju izdaje Ljekarska/Liječnička komora FBiH za dopunski rad ljekara/liječnika na području drugog kantona/županije izdaje se samo za period do kraja tekuće kalendarske godine, bez obzira na datum podnošenja zahtjeva za licencu.

Licenca koju izdaje Ljekarska/Liječnička komora FBiH, a koja se izdaje za rad kod istog poslodavca u više poslovnih jedinica u različitim kantonima/županijama, važi koliko i redovna licenca.

Ljekarska/Liječnička komora FBiH je obavezna dostaviti nadležnim kantonalnim/županijskim ljekarskim/liječničkim komorama informacije o izdatim licencama.

## V. POSTUPAK IZDAVANJA LICENCE

### 1. Za ljekare/liječnike - državljane BiH

#### Član 11

Ljekar/liječnik - državljanin BiH, nakon položenog stručnog ispita, nadležnoj ljekarskoj/liječničkoj komori podnosi zahtjev za upis u registar, nakon čega komora donosi rješenje o upisu u registar i izdaje ljekaru/liječniku licencu.

#### Član 12

Uz zahtjev iz člana 11. ovog Pravilnika Ljekar/liječnik je dužan dostaviti:

- 1) ovjerenu fotokopiju diplome medicinskog fakulteta, stečenu na akreditovanom univerzitetu u Bosni i Hercegovini koji ima akreditaciju i licencu od početka do završetka studija, odnosno rješenje o priznavanju diplome stečene u inostranstvu izdano od nadležnog organa;
- 2) ovjerenu fotokopiju uvjerenja o položenom stručnom ispitu Ljekara/liječnika ili rješenje o nostrifikaciji/priznavanju stručnog ispita od strane entitetskih ministarstava zdravstva i Brčko Distrikta.
- 3) uvjerenje o državljanstvu;
- 4) ovjerenu izjavu o poštivanju etičkih i deontoloških načela struke.

Dokumentacija iz stava 1. ovog člana predaje se u ovjerenoj fotokopiji, a original se predočava službenom licu komore na uvid.

Ljekar/liječnik koji obavlja djelatnost u okviru svoje struke na području entiteta Republika Srpska, pri podnošenju zahtjeva za izdavanje privremene licence, radi obavljanja dopunskog rada na području entiteta Federacija Bosne i Hercegovine, nije dužan dostaviti rješenje o ispisu iz registra ljekara/liječnika nadležne ljekarske/liječničke komore Republike Srpske.

#### Član 13

Uz zahtjev iz člana 11. ovog Pravilnika nadležna ljekarska/liječnička komora može tražiti dostavljanje i slijedeće dokumentacije:

- 1) CIPS;
- 2) Fotografija,

te službeno lice komore može tražiti ljekaru/liječniku ličnu kartu na uvid.

Nadležna ljekarska/liječnička komora može, po službenoj dužnosti, zatražiti od nadležnog organa iz BiH ili inostranstva podatke iz kaznene evidencije, a koji se odnose na dokaz o postojanju pravosnažne presude za počinjena krivična djela koja ljekara/liječnika čine nedostojnim za obavljanje ljekarske/liječničke djelatnosti.

#### Član 14

Ljekar/liječnik koji je položio specijalistički, odnosno subspecijalistički ispit, pored dokumentacije iz člana 12. ovog Pravilnika, uz zahtjev za izdavanje licence, dužan je dostaviti i ovjerenu fotokopiju uvjerenja o položenom specijalističkom, odnosno subspecijalističkom ispitu ili rješenje o nostrifikaciji/ priznavanju specijalističkog, odnosno subspecijalističkog staža i specijalističkog i subspecijalističkog ispita od strane entitetskih ministarstava zdravstva i Brčko Distrikta.

Ljekar/liječnik koji je stekao naziv primarijus, akademsku titulu, odnosno naučno-nastavno zvanje, dužan je komori dostaviti i ovjerenu fotokopiju uvjerenja o stečenom počasnom nazivu primarijus, odnosno akademskoj tituli ili naučno-nastavnom zvanju stečenom na akreditovanom i licenciranom medicinskom, stomatološkom i farmaceutskom fakultetu koji ima akreditaciju i licencu do sticanja akademske titule.

Akademske titule stečene u inostranstvu moraju biti priznate od strane domaćeg organa nadležnog za priznavanje inostranih dokumenata.

Dokumentacija iz stava 1., 2. i 3. ovog člana predaje se u ovjerenoj fotokopiji, a original se predočava službenom licu komore na uvid.

#### Član 15

Ljekar/liječnik koji mijenja mjesnu nadležnost komore zapošljavanjem u drugom kantonu/županiji, drugom entitetu ili Brčko Distriktu BiH, odmah i bez odlaganja ranijoj matičnoj ljekarskoj/liječničkoj komori obavezan je podnijeti zahtjev za ispis iz registra ljekara/liječnika, a novoj mjesno nadležnoj komori podnosi zahtjev za upis u registar ljekara/liječnika i izdavanje licence.

Po zaprimljenom zahtjevu ranija matična komora donosi rješenje o ispisu iz registra ljekara/liječnika te dostavlja novoj mjesno nadležnoj kantonalnoj/županijskoj komori, u vidu elektronskog dokumenta, dokumentaciju iz registra za podnosioca zahtjeva, uključujući i važeću licencu, navodeći i eventualno izrečene mjere u ranijoj matičnoj kantonalnoj/županijskoj komori.

Nova mjesno nadležna kantonalna/županijska komora ujedno je i nova matična komora člana.

Matična kantonalna/županijska komora će od podnosioca zahtjeva zatražiti dostavljanje dokumentacije u ovjerenoj fotokopiji.

Nova matična (mjesno nadležna) kantonalna/županijska komora izdat će licencu sa rokom važenja licence iz prethodne matične kantonalne/županijske komore.

### **Član 15 a**

Ljekar/liječnik koji je član jedne kantonalne/županijske ljekarske/liječničke komore, a prijavljuje se u konkursnu proceduru za posao - obavljanje djelatnosti u zdravstvenoj ustanovi smještenoj u drugom kantonu, neophodno je da u trenutku prijave posjeduje važeću licencu izdanu od strane do tada mjesno nadležne kantonalne/županijske ljekarske/liječničke komore čiji je član, bez uslovljavanja u konkursnoj proceduri prethodnog ishoda izdane od strane kantonalne/županijske ljekarske/liječničke komore drugog kantona u kojem se provodi konkursna procedura, a zbog neizvjesnosti ishoda provedene procedure.

U slučaju zasnivanja radnog odnosa shodno provedenoj konkursnoj proceduri, ljekar/liječnik će postupiti prema odredbi člana 15. stav 1. ovog Pravilnika.

### **Član 16**

Ljekar/liječnik, koji djelatnost u okviru svoje struke obavlja na području nadležnosti dviju kantonalnih/županijskih ljekarskih/liječničkih komora, i to na području nadležnosti jedne kantonalne/županijske ljekarske/liječničke komore redovnim radom, a na području nadležnosti druge kantonalne/županijske komore dopunskim radom, dužan je pribaviti privremenu licencu izdatu od Ljekarske/Liječničke komore F BiH.

Za izdavanje privremene licence iz stava 1., ljekar/liječnik je dužan dostaviti Ljekarskoj/Liječničkoj komori FBiH, posredstvom kantonalne/županijske ljekarske/liječničke komore čiji je član, zahtjev za izdavanje privremene licence i izjavu sa naznačenim nazivom i adresom ustanove u kojoj će obavljati dopunski rad, predlagatelj poslodavca za obavljanje dopunskog rada, te tripartitni ugovor, odnosno ugovor o radu ukoliko se radi o radu u dva ili više kantona kod istog poslodavca, što mora biti jasno naznačeno u ugovoru (dio radnog vremena u jednom, dio u drugom kantonu).

Kantonalna/županijska ljekarska/liječnička komora će po službenoj dužnosti dostaviti Ljekarskoj/Liječničkoj komori FBiH dokumentaciju iz prethodnog stava, zajedno sa važećom licencom ljekara/liječnika koju je izdala.

Ljekar/liječnik koji djelatnost u okviru svoje struke obavlja na području entiteta Republika Srpska ili Brčko Distrikta BiH, a dopunski rad obavlja na području jednog od kantona u Federaciji Bosne i Hercegovine, dužan je pribaviti privremenu licencu izdatu od nadležne kantonalne/županijske ljekarske/liječničke komore kantona na čijem području se obavlja dopunski rad.

Za izdavanje privremene licence iz prethodnog stava, ljekar/liječnik je dužan dostaviti nadležnoj kantonalnoj/županijskoj ljekarskoj/liječničkoj komori zahtjev za izdavanje privremene licence i izjavu sa naznačenim nazivom i adresom ustanove u kojoj će obavljati dopunski rad, predlagatelj poslodavca za obavljanje dopunskog rada, te tripartitni ugovor.

### **Član 16a**

Ljekar /Liječnik koji djelatnost svoje struke obavlja na području nadležnosti dviju kantonalnih/županijskih ljekarskih /lječničkih komora i to na području nadležnosti jedne kantonalne /županijske ljekarske/liječničke komore dio radnog vremena, a na području druge kantonalne komore drugi dio radnog vremena, dužan je pribaviti privremenu licencu izdatu od Ljekarske/Liječničke komore FBiH koja će važiti u istom vremenskom trajanju kao i redovna licenca podnosioca zahtjeva, izdata u kantonalnoj/županijskoj ljekarskoj/liječničkoj komori.

Kantonalna/županijska ljekarska/liječnička komora će po službenoj dužnosti dostaviti Ljekarskoj/Liječničkoj komori FBiH dokumentaciju iz prethodnog stava, zajedno sa važećom kantonalnom licencom ljekara/liječnika.

### **Član 16b**

Ljekari/liječnici članovi kantonalnih/županijskih ljekarskih/ liječničkih komora koji će po pozivu zdravstvene ustanove iz drugog kantona, u svrhu obavljanja poslova svog stručnog zvanja kroz naučno i stručno istraživanje u oblasti zdravstva, edukacije, sudjelovanje u seminarima, kongresima i drugim radionicama na kojima prezentiraju stečene vještine svog stručnog zvanja izravno na pacijentima dobrovoljcima, obavljanja poslova konsultanta u zdravstvenim ustanovama i privatnim praksama u Federaciji BiH,

sudjelovanja u projektima iz oblasti zdravstva koji podrazumijevaju primjenu stečenih stručnih znanja i vještina izravno na pacijentima dobrovoljcima, volonterskog rada u svom stručnom zvanju, uz zahtjev za izdavanje privremene licence, dužni su Ljekarskoj/Liječničkoj komori FBiH dostaviti Pozivno pismo (poziv ustanove, sporazum ili sl.).

U slučajevima opisanim u prethodnom stavu Ljekarska/ Liječnička komora FBiH ljekaru/liječniku izdaje privremenu licencu čije trajanje će biti vezano za datum angažmana ljekara/liječnika u ustanovi u kojoj će privremeno djelovati.

## **Član 17**

Ljekar/liječnik - državljanin BiH, koji je djelatnost u okviru svoje struke obavljao u inostranstvu, prilikom podnošenja zahtjeva za upis u registar i izdavanje licence nadležnoj Ljekarskoj/liječničkoj komori, osim dokumentacije iz čl. 12. i 14. ovog Pravilnika, priložit će i potvrdu o članstvu u Ljekarskoj/liječničkoj komori čiji je član te potvrdu o poštivanju etičkih principa struke, odnosno da se protiv podnosioca zahtjeva ne vodi disciplinski postupak.

Potvrda o poštovanju etičkih principa struke, odnosno potvrda o nevođenju disciplinskog postupka ne može biti starija od tri mjeseca, a izdaje je Ljekarska/liječnička komora čiji je član podnositelj zahtjeva.

Dokumentacija iz stava 1. i 2. ovog člana predaje se u ovjerenoj fotokopiji, a original se predočava službenom licu komore na uvid.

Dokumentacija iz st. 1. i 2. ovog člana mora biti na jednom od jezika koji su u službenoj upotrebi u BiH, odnosno, ukoliko je na stranom jeziku, mora biti prevedena na jedan od jezika koji su u službenoj upotrebi u BiH od strane ovlaštenog sudskog tumača.

## **2. Za ljekare/liječnike - strane državljane**

### **Član 18**

Ljekar/liječnik - strani državljanin, po osnovu radne dozvole, može podnijeti zahtjev za izdavanje licence u Federaciji BiH.

Uz zahtjev za izdavanje licence, osim dokumentacije iz čl. 12. i 14. ovog Pravilnika, Ljekar/liječnik - strani državljanin dužan je priložiti i:

- 1) dokaz o državljanstvu zemlje porijekla - nadležan organ zemlje porijekla;
- 2) odobrenje za (privremeni ili stalni) boravak stranca u BiH - nadležna Služba za poslove sa strancima pri Ministarstvu sigurnosti BiH;
- 3) radnu dozvolu - nadležna kantonalna Služba za zapošljavanje;
- 4) potvrdu o članstvu i aktivnostima u Ljekarskoj/ liječničkoj komori zemlje porijekla;
- 5) potvrdu o poštivanju etičkih principa struke, odnosno da se protiv podnosioca zahtjeva ne vodi disciplinski postupak ("a certificate of good standing") koja ne smije biti starija od tri mjeseca, a izdaje je nadležna Ljekarska/liječnička komora čiji je član podnositelj zahtjeva,
- 6) potvrdu o poznavanju jednog od jezika koji je u službenoj upotrebi u BiH, na nivou koji je potreban za nesmetanu i nužnu komunikaciju sa pacijentom, izdatu od akreditovane visokoškolske institucije u F BiH, minimalno stepen C1 (napredni korisnik), osim u slučajevima ukoliko je Ljekar/liječnik dodiplomsku nastavu završio na jednom od jezika koji je u službenoj upotrebi u BiH.

Ljekar/liječnik - strani državljanin nije dužan priložiti uvjerenje o položenom stručnom ispitu ukoliko je državljanin zemlje koja ima bolonjski sistem obrazovanja.

Dokumentacija iz stava 1. i 2. ovog člana predaje se u ovjerenoj fotokopiji, a original se predočava službenom licu komore na uvid.

Dokumentacija iz st. 1. i 2. ovog člana mora biti na jednom od jezika koji su u službenoj upotrebi u BiH, odnosno, ukoliko je na stranom jeziku, mora biti prevedena na jedan od jezika koji su u službenoj upotrebi u BiH od strane ovlaštenog sudskog tumača.

### **Član 19**

Nadležna Ljekarska/liječnička komora, ljekarima/liječnicima iz člana 18. ovog Pravilnika, izdat će privremenu licencu na period jednak periodu važenja radne dozvole izdate ljekaru/liječniku - stranom državljaninu od strane nadležne kantonalne Službe za zapošljavanje.

Ukoliko je Ljekar/liječnik, iz člana 18. ovog Pravilnika, po osnovu Zakona o strancima ("Sl.novine BiH", broj 88/2015, 34/2021), oslobođen obaveze pribavljanja radne dozvole, nadležna Ljekarska/liječnička komora će izdati privremenu licencu na period jednak odobrenom privremenom boravku.

Ukoliko je ljekaru/liječniku iz stava 2. ovog člana od strane nadležnog organa odobren stalni boravak u BiH nadležna ljekarska/liječnička komora će izdati redovnu licencu.

## **Član 20**

Ljekari/liječnici - strani državljani koji privremeno borave na teritoriji Federacije BiH u svrhu obavljanja poslova svog stručnog naziva kroz naučno i stručno istraživanje u oblasti zdravstva, edukacije, sudjelovanje u seminarima, kongresima i drugim radionicama na kojima prezentiraju stečene vještine svog stručnog zvanja izravno na pacijentima dobrovoljcima, obavljanja poslova konsultanta u zdravstvenim ustanovama i privatnim praksama u Federaciji BiH, sudjelovanja u projektima iz oblasti zdravstva koji podrazumijevaju primjenu stečenih stručnih znanja i vještina izravno na pacijentima dobrovoljcima, volonterskog rada u svom stručnom zvanju, uz zahtjev za izdavanje licence, prilažu nadležnoj ljekarskoj/liječničkoj komori i dokumentaciju navedenu u članu 18. ovog Pravilnika, kao i važeću licencu matične komore, te dokaz od nadležnog tijela kojim se potvrđuje status privremenog boravka na teritoriju Federacije BiH.

Ljekarima/liječnicima - stranim državljanima iz stava 1. ovog člana, nadležna ljekarska/liječnička komora će izdati privremenu licencu sa rokom važenja koliko traje i privremeni boravak na teritoriji Federacije BiH iz razloga predviđenih u stavu 1. ovog člana.

## **Član 20 a**

Izuzetak od odredbe člana 20. ovog Pravilnika čine Ljekari/liječnici - strani državljani koji privremeno borave na teritoriji Federacije Bosne i Hercegovine po pozivu zdravstvenih ustanova i to općih, specijalnih, kantonalnih i univerzitetskookliničkih bolnica u nedostatku ljekarskog/liječničkog kadra, radi obavljanja najzahtjevnijih operativnih zahvata i drugih metoda liječenja, te hitnih procedura životno ugroženih pacijenata, a samo i isključivo u svrhu edukacije domaćeg kadra, te uz zahtjev za izdavanje licence prilažu nadležnoj Ljekarskoj/Liječničkoj komori FBiH slijedeću dokumentaciju:

1) odobrenje za privremeni boravak stranca u BiH po osnovu poziva zdravstvene ustanove iz Federacije Bosne i Hercegovine (za izdavanje odobrenja nadležna Služba za poslove sa strancima pri Ministarstvu sigurnosti BiH);

2) potvrdu o članstvu i aktivnostima u ljekarskoj/ liječničkoj komori zemlje porijekla;

3) potvrdu o poštivanju etičkih principa struke, odnosno da se protiv podnosioca zahtjeva ne vodi disciplinski postupak ("a certificate of good standing") koja ne smije biti starija od tri mjeseca, a izdaje je nadležna ljekarska/liječnička komora čiji je član podnositelj zahtjeva.

Dokumentacija iz stava 1. ovog člana predaje se u ovjerenoj fotokopiji, a original se predočava službenom licu komore na uvid.

Dokumentacija iz st. 1. ovog člana mora biti na jednom od jezika koji su u službenoj upotrebi u Bosni i Hercegovini, odnosno, ukoliko je na stranom jeziku, mora biti prevedena na jedan od jezika koji su u službenoj upotrebi u Bosni i Hercegovini od strane ovlaštenog sudskog tumača.

Opće, specijalne i kantonalne bolnice iz razloga navedenih u stavu 1. ovog člana mogu samo u trajanju od ukupno 30 (trideset) dana u toku jedne kalendarske godine uputiti poziv ljekarima/liječnicima - stranim državljanima radi obavljanja najzahtjevnijih operativnih zahvata i drugih metoda liječenja, te hitnih procedura životno ugroženih pacijenata, isključivo u svrhu edukacije domaćeg kadra, dok je diskreciono pravo odlučivanja zdravstvene ustanove da li će navedeni period od ukupno 30 (trideset) dana u toku jedne kalendarske godine iskoristiti u kontinuitetu (integralno) za poziv jednom ljekaru/liječniku - stranom državljaninu ili parcijalno za pozive većem broju ljekara/liječnika - stranim državljanima, s tim da zbirno njihov period boravka i profesionalnog djelovanja ne smije prelaziti period od ukupno 30 (trideset) dana u toku jedne kalendarske godine.

Univerzitetskookliničke bolnice nemaju vremensko ograničenje upućivanja poziva ljekarima/liječnicima - stranim državljanima u toku jedne kalendarske godine odnosno nisu ograničeni brojem ljekara/liječnika kojima se upućuje poziv ili njihovim periodom boravka odnosno profesionalnog djelovanja u istima, s tim da Ljekarska/Liječnička komora FBiH jednom ljekaru/liječniku koji dolazi po pozivu univerzitetskookliničke bolnice, iz razloga predviđenih u stavu 1. ovog člana, može izdati privremenu licencu sa rokom važenja od najviše 28 (dvadeset i osam) dana u toku jedne kalendarske godine.

Ljekarima/liječnicima - stranim državljanima koji dolaze po pozivu općih, specijalnih i kantonalnih bolnica, Ljekarska/ Liječnička komora FBiH će izdati privremenu licencu sa rokom važenja prema traženju zdravstvene ustanove u koju dolazi.

## **3. Za penzionisane ljekare**

### **Član 21**

Ljekaru/liječniku - korisniku starosne penzije, koji je bio nosilac licence do prestanka radnog odnosa nadležna ljekarska/liječnička komora može izdati privremenu licencu na period od jedne (1) godine.

Ukoliko je ljekar/liječnik nosilac redovne licence prilikom sticanja statusa penzionera ista se ukida sa danom sticanja prava iz PIO/MIO, a ljekaru/liječniku, komora iz stava 1. ovog člana može izdati privremenu licencu.

Ljekar/liječnik iz stava 1. ovog člana dužan je uz zahtjev za izdavanje licence, osim dokumentacije navedene u čl. 12. i 14. ovog Pravilnika, priložiti i:

- 1) ovjerenu fotokopiju rješenja o korištenju starosne penzije;
- 2) ljekarsko uvjerenje o zdravstvenoj sposobnosti za obavljanje poslova svoje struke.

Dokumentacija iz stava 2. ovog člana predaje se u ovjerenoj fotokopiji, a original se predočava službenom licu komore na uvid.

## **Član 22**

Ljekaru/liječniku - državljanu BiH ili stranom državljanu, a koji u roku od 15 godina od dana položenog stručnog ispita nije obavljao minimalno dvije godine, u punom radnom vremenu, djelatnost svog stručnog naziva, nadležna ljekarska/liječnička komora će izdati licencu samo uz prethodnu provjeru stručne osposobljenosti.

Provjera stručne osposobljenosti ljekara/liječnika iz stava 1. ovog člana obavlja se pred Komisijom kantonalne/županijske ljekarske/liječničke komore u koju se obavezno kooptiraju kao članovi:

- 1) Ljekari/liječnici stručnjaci iz oblasti iz koje se ispit polaže, iste ili veće stručne osposobljenosti u odnosu na kandidata.

Ljekaru iz stava 1. ovog člana koji je zadovoljio u postupku provjere stručne osposobljenosti, izdaje se licenca s danom položenog ispita radi provjere stručne osposobljenosti.

4. Postupanje nadležne ljekarske komore po podnijetom zahtjevu za izdavanje licence

## **Član 23**

Zahtjev za izdavanje licence predaje se neposredno ili šalje poštom pismeno na adresu nadležne ljekarske/liječničke komore.

Prilikom neposredne predaje zahtjeva, isti mora biti predat lično od strane člana komore, a ako zahtjev neposredno predaje drugo lice, u ime i za račun člana komore, uz zahtjev se mora dostaviti i originalna važeća punomoć.

## **Član 24**

Ukoliko zahtjev sadrži neki formalni nedostatak koji sprječava postupanje po istom (nerazumljiv ili nepotpun) nadležna ljekarska/liječnička komora je dužna učiniti one radnje koje će osigurati da se nedostaci otklone i odredit će podnosiocu rok u kome je dužan da to učini.

Ako podnositelj ne otkloni nedostatke u određenom roku, smatrat će se da zahtjev nije ni podnesen, a komora će donijeti zaključak protiv kojeg se može izjaviti žalba drugostepenom organu komore, u skladu sa Statutom i drugim aktima nadležne ljekarske/liječničke komore.

## **Član 25**

Postupak razmatranja zahtjeva za upis ljekara/liječnika u registar članova i izdavanje licence, nadležne ljekarske/liječničke komore (član 4 - 7 Pravilnika) provode na način utvrđen ovim Pravilnikom te Statutom i drugim aktima nadležnih ljekarskih/liječničkih komora (član 4 - 7 Pravilnika).

Na osnovu provedenog postupka nadležne ljekarske/liječničke komore donose odluku (rješenje) o upisu u registar te izdavanju licence ljekaru/liječniku - članu komore, odnosno odluku (rješenje) kojim se odbija zahtjev za upis i izdavanje licence.

Rok za provođenje postupka iz stava 1. i 2. ovog člana je trideset (30) dana od dana prijema uredno dokumentiranog zahtjeva.

## **Član 26**

U slučajevima propisanim članom 5. stav 1. i 2. ovog Pravilnika, po prijemu uredno dokumentiranog zahtjeva predsjednik Ljekarske/Liječničke komore FBiH donosi rješenje o upisu u registar ljekara/liječnika i izdaje licencu članu komore.

Ljekar/liječnik, koji djelatnost u okviru svoje struke obavlja na području nadležnosti dviju kantonalnih/županijskih ljekarskih/liječničkih komora, ili na području nadležnosti jedne kantonalne/županijske ljekarske/liječničke komore redovnim radom, a na području nadležnosti druge kantonalne/županijske ljekarske/liječničke komore dopunskim radom, zahtjev za izdavanje licence podnosi Ljekarskoj/Liječničkoj komori F BiH putem matične komore.

Ljekarska/liječnička komora zahtjev uz dokumentaciju iz člana 12. i 14. ovog Pravilnika, odnosno, izvod iz registra, dostavlja Ljekarskoj/Liječničkoj komori F BiH.

Izvod iz registra obavezno sadrži sve podatke o stručnosti ljekara/liječnika, ovjeren pečatom i potpisan od strane matične komore.

Ljekaru/liječniku iz stava 2. ovog člana Ljekarska/Liječnička komora F BiH u roku od 30 dana od dana zaprimanja zahtjeva izdaje privremenu licencu u skladu sa ovim Pravilnikom.

Ljekarska/Liječnička komora F BiH licencu za rad dostavlja ljekaru/liječniku putem nadležne komore kojoj je podnio zahtjev.

Uz zahtjev, iz stava 2. ovog člana, ljekar/liječnik je dužan dostaviti i dokaz o uplati naknade u visini prema odluci Upravnog odbora Ljekarske/Liječničke komore F BiH.

### **Član 27**

Ukoliko nadležne Ljekarske/liječničke komore u utvrđenom roku ne donesu odluku (rješenje) dužne su ljekarima/liječnicima izdati potvrdu o prijemu uredno dokumentiranih zahtjeva za izdavanje licence.

### **Član 28**

Nakon izvršenog upisa u registar ljekara/liječnika nadležne Ljekarske/liječničke komore izdaju licence u skladu sa odredbama ovog Pravilnika.

### **Član 29**

Nadležne Ljekarske/liječničke komore dužne su svaku promjenu podataka u registrima (izvršeni upis, ispis te lične podatke članova: ime i prezime, JMBG, adresa prebivališta, specijalizacija, subspecijalizacija, akademska titula, odnosno naučno-nastavno zvanje, počasni naziv primarijus, radni status, kao i podatke o izdatim licencama) pravovremeno, a najmanje deset dana od utvrđenih izmjena u kantonalnoj/županijskoj komori, dostavljati Ljekarskoj/Liječničkoj komori FBiH.

## **VI. POSTUPAK ZAMJENE LICENCE**

### **Član 30**

Ljekar/liječnik - član komore, dužan je najkasnije u roku od 30 (trideset) dana obavijestiti komoru o svim nastalim promjenama koje su od uticaja na izdatu licencu (stečen stručni naziv specijalista, odnosno subspecijalista, stečeno zvanje primarijus, stečeno naučno-nastavno zvanje i sl.) i koje se upisuju u registar članova komore.

### **Član 31**

Ljekar/liječnik - član komore dužan je od komore zatražiti zamjenu važeće licence, ukoliko unutar roka važenja izdate licence stekne status specijaliste određene specijalnosti ili subspecijalnosti, stekne naziv primarijus, odnosno akademski stepen ili je izabran u naučno-nastavno ili nastavno zvanje te u slučajevima promjene ličnih podataka.

Zahtjev za zamjenu licence podnosi se komori zajedno sa dokumentacijom kojom se dokazuje sticanje statusa iz stava 1. ovog člana.

Nova licenca sa izmijenjenim podacima ima isti rok važnosti kao i licenca koja se mijenja.

Odredbe ovog Pravilnika o načinu podnošenja zahtjeva za izdavanje licence, sadržaju i izgledu dokumentacije, kao i načinu i rokovima postupka rješavanja zahtjeva za izdavanje licence shodno se primjenjuju i na zamjenu licence unutar vremenskog važenja licence.

## **VII. POSTUPAK OBNAVLJANJA LICENCE**

### **Član 32**

Ljekar/liječnik stiče pravo na obnovu licence, ako je u roku važenja licence, u postupku kontinuirane edukacije, zadovoljio kriterije stručnog usavršavanja utvrđene Pravilnikom o zajedničkim kriterijima i postupcima stručnog usavršavanja ljekara/liječnika Ljekarske/Liječničke komore FBiH.

Ljekar/liječnik starosne dobi 65 godina života i više, te ljekar/liječnik strani državljanin stiče pravo na obnovu privremene licence, ako je uz ispunjenje uvjeta iz člana 18. odnosno člana 21. ovog Pravilnika, u roku važenja prethodne privremene licence, stekao minimalno 15 (petnaest) bodova u postupku kontinuirane edukacije, te zadovoljio kriterije stručnog usavršavanja utvrđene Pravilnikom o zajedničkim kriterijima i postupcima stručnog usavršavanja ljekara/liječnika Ljekarske/Liječničke komore FBiH.

### **Član 33**

Ljekar/liječnik podnosi komori zahtjev za obnavljanje licence najkasnije 60 dana prije isteka roka na koji je važeća licenca izdata.

Uz zahtjev iz stava 1. ovog člana podnosi se dokumentacija kojom se dokazuje ispunjenost kriterija stručnog usavršavanja u postupku kontinuirane edukacije te druga dokumentacija u skladu sa Statutom i drugim aktima kantonalnih/županijskih ljekarskih/liječničkih komora.

Odredbe ovog Pravilnika o načinu podnošenja zahtjeva za izdavanje licence, sadržaju i izgledu dokumentacije, kao i načinu i rokovima rješavanja zahtjeva za izdavanje licence shodno se primjenjuju i u postupku obnavljanja licence.

#### **Član 34**

Ukoliko je Ljekar/liječnik iz opravdanih razloga, kao što su: privremena spriječenost za rad duža od šest mjeseci, trudnoća i komplikacije u vezi sa trudnoćom, porodijsko odsustvo i odsustvo radi njege djeteta, odnosno člana uže porodice i drugi opravdani slučajevi, bio spriječen da učestvuje u postupku kontinuirane edukacije čime nije ostvario uslove utvrđene članom 32. ovog Pravilnika, rok za ispunjavanje uslova za obnavljanje licence ljekaru/liječniku će se produžiti.

Nadležne ljekarske/liječničke komore će ljekarima/liječnicima iz stava 1. ovog člana produžiti period važenja licence za period jednak trajanju navedenih razloga.

U slučajevima iz stava 1. i 2. ovog člana, Ljekar/liječnik je dužan komori podnijeti dokaze kojim dokazuje postojanje okolnosti koje su prouzročile nemogućnost obnavljanja licence u propisanom roku.

#### **Član 35**

U ostalim slučajevima, ukoliko Ljekar/liječnik nije učestvovao u postupku kontinuirane edukacije te nije ostvario uslove utvrđene članom 32. ovog Pravilnika, nadležne ljekarske/liječničke komore će izdati licencu samo uz prethodnu provjeru stručne osposobljenosti.

Provjera stručne osposobljenosti ljekara/liječnika iz stava 1. ovog člana obavlja se pred Komisijom nadležnih ljekarskih/ liječničkih komora u koju se obavezno kooptiraju kao članovi:

1) predstavnici strukovnog udruženja, ukoliko je isto osnovano.

Ljekaru/liječniku iz stava 1. ovog člana koji je zadovoljio u postupku provjere stručne osposobljenosti, licenca se izdaje s danom položenog ispita radi provjere stručne osposobljenosti.

### **VIII. POSTUPAK IZDAVANJE DUPLIKATA LICENCE**

#### **Član 36**

Nadležne ljekarske/liječničke komore će ljekaru na njegov zahtjev izdati duplikat licence u slučaju:

- 1) gubitka licence,
- 2) otuđenja licence,
- 3) oštećena ili uništenja licence.

#### **Član 37**

Po prijemu zahtjeva, nadležne ljekarske/liječničke komore će izdati rješenje kojim izgubljenju, odnosno otuđenu, oštećenu ili uništenu licencu oglašavaju nevažećom.

Duplikat licence se izdaje u roku od trideset (30) dana od dana podnošenja zahtjeva.

Do izdavanja duplikata licence ljekaru/liječniku se izdaje potvrda o predaji zahtjeva za izdavanje duplikata licence.

### **IX. ODUZIMANJE LICENCE**

#### **Član 38**

Licenca može biti oduzeta ljekaru/liječniku, privremeno ili trajno.

Komora oduzima licencu ukoliko:

- 1) Ljekar/liječnik ne ispunjava uvjete za obnavljanje licence, odnosno ne zadovoljava kriterije stručnog usavršavanja utvrđene Pravilnikom o zajedničkim kriterijima i postupcima stručnog usavršavanja ljekara/liječnika Ljekarske/Liječničke komore FBiH;
- 2) komora odredi tu mjeru kao najstrožu kaznu zbog kršenja etičkih principa struke;
- 3) Ljekar/liječnik dopunski rad obavlja suprotno odredbama Zakona;
- 4) Ljekar/liječnik ne plaća članarinu nadležnoj Ljekarskoj/ liječničkoj komori u vremenskom periodu propisanom Statutom nadležne kantonalne/županijske Ljekarske/liječničke komore;
- 5) u drugim slučajevima utvrđenim Statutima nadležnih Ljekarskih/liječničkih komora.

### **Član 39**

Ukoliko nadležne Ljekarske/liječničke komore utvrde da su nastupili uvjeti za oduzimanje licence iz člana 38. ovog Pravilnika, donose odluku o oduzimanju licence.

Protiv odluke iz stava 1. ovog člana dozvoljena je žalba nadležnom drugostepenom organu komore, na način i pod uvjetima utvrđenim Statutima i drugim aktima nadležnih Ljekarskih/ liječničkih komora.

### **Član 40**

Nadležne Ljekarske/liječničke komore su dužne, bez odlaganja, o privremenom ili trajnom oduzimanju licence, obavijestiti poslodavca ljekara/liječnika, zavod zdravstvenog osiguranja, kao i nadležnu zdravstvenu inspekciju.

## **X. UKIDANJE I PONIŠTAVANJE LICENCE**

### **Član 41**

Predsjednik nadležne Ljekarske/liječničke komore, po službenoj dužnosti, donosi bez odlaganja odluku o ukidanju ili poništavanju licence ljekara/liječnika, postupajući po pravosnažnim odlukama nadležnih sudova i upravnih organa.

Nadležne Ljekarske/liječničke komore su dužne, bez odlaganja, o ukidanju i poništavanju licence obavijestiti poslodavca ljekara/liječnika, zavod zdravstvenog osiguranja, kao i nadležnu zdravstvenu inspekciju.

## **XI. IZGLED I SADRŽAJ LICENCE**

### **Član 42**

Licenca izdata od strane nadležnih Ljekarskih/liječničkih komora sadrži slijedeće podatke:

- 1) naziv, znak i sjedište nadležne Ljekarske/liječničke komore koja licencu izdaje, kao i naziv i znak Ljekarske/Liječničke komore FBiH;
- 2) broj licence;
- 3) mjesto i datum izdavanja licence;
- 4) ime, ime jednog roditelja i prezime ljekara/liječnika;
- 5) datum, mjesto i država rođenja ljekara/liječnika;
- 6) naznaka stručnog naziva, naziva specijaliste, odnosno subspecijaliste, akademske titule, odnosno naučno-nastavnog zvanja ljekara/liječnika ili počasnog zvanja primarijus;
- 7) stručna oblast za koju se licenca izdaje;
- 8) period važenja licence (dan, mjesec, godina);
- 9) potpis predsjednika nadležne Ljekarske/liječničke komore i pečat, odnosno suhi žig.

Licenca iz stava 1. ovog člana izdaje se u 3 primjerka i to:

- 1) 1 primjerak formata A4 kolor,
- 2) 2 primjerka formata A4 crno bijeli.

### **Član 43**

Licenca izdata od strane nadležnih Ljekarskih/liječničkih komora sadrži broj koji čine slijedeće oznake:

- 1) F - slovna oznaka F - predstavlja oznaku pripadnosti komori sa teritorija Federacije BiH;
- 2) 01 - 10 - brojevi od 01 do 10 - predstavljaju oznaku pripadnosti kantonalnoj/županijskoj Ljekarskoj/liječničkoj komori;
- 3) A - slovna oznaka A - predstavlja oznaku prve licence;
- 4) R - slovna oznaka R - predstavlja oznaku obnovljene licence;
- 5) Aa / Ra - slovna oznaka a, b, c - predstavlja oznaku licence / obnovljene licence (Aa / Ra) izdate usljed promjene nastale u periodu važenja licence / obnovljene licence (A / R);
- 6) 1 - redni broj 1, 2, 3 (prva, druga, treća) - predstavlja oznaku rednog broja izdate licence;
- 7) 0001 - predstavlja broj registra nadležnih Ljekarskih/liječničkih komora.
- 8) SD - strani državljanin

### **Član 44**

Nadležne Ljekarske/liječničke komore izdaju licence čija numeracija je utvrđena na način:

- 1) Ljekarska komora a - F01A0001
- 2) Ljekarska komora Posavskog kantona - F02A0001
- 3) Ljekarska komora Tuzlanskog kantona - F03A0001
- 4) Ljekarska komora Zeničko-dobojskog kantona - F04A0001
- 5) Ljekarska komora Bosansko-podrinjskog kantona - F05A0001
- 6) Ljekarska komora Srednjobosanskog kantona - F06A0001
- 7) Ljekarska komora Kantona Sarajevo - F09A0001
- 8) Ljekarska komora Herceg-bosanske županije (Kanton 10) - F10A0001

U slučajevima predviđenim članom 5. stav 2. ovog Pravilnika, Ljekarska/Liječnička komora F BiH će dodijeliti brojeve licenci na način:

- 1) F - slovna oznaka F - predstavlja oznaku pripadnosti komori sa teritorija Federacije BiH;
- 2) 01 - 10 - brojevi od 01 do 10 - predstavljaju oznaku pripadnosti kantonalnoj/županijskoj Ljekarskoj/liječničkoj komori;
- 3) A - slovna oznaka A - predstavlja oznaku prve licence;
- 4) 001 - redni broj 1, 2, 3 (prva, druga, treća) - predstavlja oznaku rednog broja licence;
- 5) P - slovna oznaka P - predstavlja privremenu licencu;
- 6) 01 - 10 - brojevi od 01 do 10 - predstavljaju oznaku kantona/županije gdje ljekar/liječnik obavlja dopunski rad;
- 7) P01-10/P01-10 - Oznaka za Privremenu licencu za rad u više kantona;
- 8) R - redovna licenca Ljekarske/Liječničke komore FBiH.

## XII. PRIJELAZNE I ZAVRŠNE ODREDBE

### Član 45

Kantonalnim/županijskim ljekarskim/liječničkim komorama koje nakon usvajanja ovog Pravilnika pristupe Ljekarskoj/Liječničkoj komori Federacije Bosne i Hercegovine dodijelit će se numeracija u skladu sa članom 44. ovog Pravilnika.

### Član 46

Nadležne ljekarske/liječničke komore su dužne, u roku od 90 dana od dana stupanja na snagu ovog Pravilnika, uskladiti svoje opće akte sa odredbama ovog Pravilnika te osigurati svojim članovima izdavanje licence na obrascu propisanom ovim Pravilnikom.

### Član 47

Ljekarska/Liječnička komora FBiH će nakon usvajanja ovog Pravilnika od strane Skupštine, a prije njegove objave, isti Pravilnik dostaviti Federalnom ministarstvu zdravstva koje je dužno na usvojeni tekst Pravilnika dati Komori suglasnost ili mišljenje, odnosno potvrdu ili odobrenje, u roku od 15 dana od dana kada mu je zatraženo.

Ukoliko Federalno ministarstvo zdravstva u navedenom roku ne izda svoj akt i ne dostavi ga Ljekarskoj/Liječničkoj komori FBiH, kojim daje ili odbija suglasnost, potvrdu ili odobrenje, odnosno mišljenje, smatra se da je dalo suglasnost, potvrdu ili odobrenje, odnosno mišljenje, nakon čega će Komora objaviti Pravilnik.

Ovaj Pravilnik stupa na snagu osmog dana od dana objavljivanja u Službenim novinama Federacije BiH i na web stranici Ljekarske/Liječničke komore FBiH [www.fmcbih.ba](http://www.fmcbih.ba).

Danom stupanja na snagu ovog Pravilnika prestaje da važi Pravilnik o utvrđivanju zajedničkih kriterija za licenciranje članova Ljekarske/Liječničke komore F BiH i članova kantonalnih/županijskih ljekarskih/liječničkih komora (br. 01-95/14 od 26.04.2014. godine, br. 01-50/18 od 21.04.2018. godine, br. 01-214/23 od 02.12.2023. godine, br. 01-129 od 27.05.2024. godine, br. 01-55/25 od 22.03.2025. godine i br. 01-68/25 od 23.05.2025. godine).

Započeti postupci koji su na dan stupanja na snagu ovog Pravilnika u toku pred tijelima Ljekarske/Liječničke komore FBiH, nastavit će se i dovršiti u skladu s odredbama ovog Pravilnika.

Ukoliko ovaj Pravilnik ne sadrži odredbe o određenom postupku shodno će se primjenjivati odgovarajuće odredbe Zakona o upravnom postupku FBiH.

Ukoliko se u toku postupka pojavi prethodno pitanje odlučno za raspravljanje o zahtjevu ljekara/liječnika, dokaze na kojima zasniva svoj zahtjev, dužan je pribaviti lično ljekar/liječnik kao podnosilac zahtjeva.

Nadležne ljekarske/liječničke komore neće donositi odluke o podnesenim zahtjevima za izdavanje i obnavljanje licence ljekarima/liječnicima koji posjeduju diplome Medicinskog fakulteta Evropskog univerziteta "KALLOS" Tuzla i Fakulteta zdravstvenih nauka Internacionalnog univerziteta u Goraždu, sve dok se kod nadležnih sudova u postupcima koji su u toku, kao prethodno pitanje ne utvrdi da li su navedene diplome medicinskog fakulteta, stečene na akreditovanom univerzitetu u Bosni i Hercegovini, te izdane sukladno odredbama Okvirnog zakona o visokom obrazovanju u BiH."

### Član 48

Autentično tumačenje ovog Pravilnika daje Upravni odbor Ljekarske/Liječničke komore FBiH.